Universal Declaration of Human Rights - Malay (Arabic)

UDHR in Unicode		
-----------------	--	--

ڤراشتهارن حق اساسي مأنسي سجاكت

مقدمه

بهاواساث ڤڠيعترافن كأوتوهن كموليأن دان حق سامرات سرتا اساسي يڠ تق ترڤيسه باڬي سلوروه اومت مأنسي عداله اساس كبيبسن، كعاديلن دان كداماين دنيا.

بهاواساث ڤڠاباين سرتا ڤڠهينأن ترهادڤ حق اساسي مأنسي تله ڤون مڠعاقبتكن تيندقن تركوتوق يڠ تله ملڠڬري ڤراسأن هاتي اومت مأنسي، دان مونچولڻ سبواه دنيا د مان مأنسي اكن منعمتي كبيبسن براوچڤ دان مڠانوت كڤرچايأن سرتا كبيبسن دري راستاكوت دان چيتاراس تله ڤون دأشتهاركن سباكاي اسڤيراسي تراكوڠ سلوروه اومت مأنسي.

سكيراث كيت تيدق ماهو مندوروڠ مأنسي دالم كأدأن تردسق، سباكاي ڤيليهن تراخير، ممبرونتق ممنتڠ كظاليمن سرتا ڤنيندسن، مك عداله ڤنتيڠ باكي حق اساسي مأنسي دڤرتاهنكن اوليه كدولتن اوندڠ٢.

بهاواساث عداله ڤنتيڠ باڬي مماجوكن ڤركمبڠن ڤرهوبوڠن ڤرصحابتن د انتارا نڬارا٢.

بهاواساث رعيت بغسا۲ برساتو، دالم ڤياڬمث تله سكالي لاڬي منڬسكن كڤرچايأن مريك ترهادڤ حق اساسي مأنسي، ترهادڤ كموليأن سرتا نيلايديري مأنسي دان ترهادڤ حق سامرات للاكي دان ڤرمڤوان دان تله منتڤكن كعزمن اونتوق مماجوكن ڤركمبڠن سوسيال دان طرف هيدوڤ يڠ لبيه سمڤرنا دالم سواسان كبيبسن يڠ لبيه لواس.

بهاواساث نكارا۲ اڠڬوتا تله براقرار اونتوق ماسيڠ۲ منچاڤاي، دڠن كرجاسام بڠسا۲ برساتو، ڤڠوتارأن كحرمتن سجاڬت ترهادڤ، سرتا ڤماتوهن، حق اساسي مأنسي دان كبيبسن اساسي.

بهاواساڻ ساتو فهمن برسام ترهادڤ حق سرتا كبيبسن اين سلوروهڻ عداله ترڤنتيڠ دمي منجاديكن اقرار اين كثاتأن سڤنوهڻ.

مك دڠن اين

قرهيمڤونن اڬوڠ مڠيشتهاركن

ڤراشتهارن سجاڬت حق اساسي مأنسي اين سباڬاي سواتو اوكورن برسام ترهادڤ ڤنچاڤاين اوليه سلوروه اومت مأنسي دان كسموا نڬارا دڠن توجوان سوڤاي ستياڤ اينديۏيدو دان ستياڤ بادن مشاركت، دڠن سننتياس مڠيڠتي ڤراشتهارن اين، هندقله برعزم ملالؤي ڨڠاجرن دان ڨنديديقن باڬي مماجوكن سانجوڠن ترهادڤ سلوروه حق۲ دان كبيبسن اين دان سچارا لڠكه۲ برڨريڠكت ڨريڠكت، د بيدڠ نڬارا دان انتارابڠسا، باڬي منجامينكن ڨڠيعترافن دان ڨماتوهن سجاڬتڻ يڠ بركسن، كدوا دواڻ د انتارا نڬارا۲ اڠڬوتا ماسيڠ۲ دان رعيت ولايه۲ د باوه بيدڠكواس مريك.

ڤركارا 1.

سموا مأنسي دلاهيركن بيبس دان سامرات دري سڬي كموليأن دان حق٢. مريك ممڤوثاي ڤميكيرن دان ڤراسأن هاتي دان هندقله برتيندق د انتارا ساتو سام لائن دڠن سماڠت ڤرساودارأن.

ڤركارا 2.

ستياڤ اورڠ عداله برحق كڤد سموا حق٢ دان كبيبسن يڠ ترمكتوب دالم ڤراشتهارن اين، تنڤا سبارڠ اڤ جوا ڤمبيذأن، سڤرتي بڠسا، ورنا كوليت، جنتينا، بهاس، اڬام، فهم ڤوليتيك اتاو لائن٢ فهمن، اصل اصول بڠسا كتورونن اتاو سوسيال هرتا بندا، كلاهيرن اتاو اڤ٢ طرف لائن.

ستروسث، تياد سبارڠ ڤمبيذأن بوليه دبوات براساسكن ڤادا طرف ڤوليتيك اتاو بيدڠكواس اتاوڤون انتارابڠسا سسبواه نڬارا اتاو ولايه داتڠڽ سسأورڠ ايت، سام اياڻ مرديك، برامانه، تنڤا ڤمرينتهن سنديري اتاو براد د باوه اڤ٢ سكتن كدولتن لائنڽ.

ڤركارا 3.

ستياڤ اورڠ عداله برحق كڤد ثاوا، كبيبسن دان كسلامتن ديري.

ڤركارا 4.

تياد سسياڤا ڤون بوليه دڤرهمبا اتاو دڤرعبديكن; كعبدين دان داڬڠن همبا عبدي هندقله دلارڠ دالم سموا بنتوقڨ.

ڤركارا 5.

تياد سسياڤا ڤون بوليه دكناكن سيقسأن اتاو لاينن اتاو حكومن يڠ ظاليم، تيدق برڤريكمأنسيأن اتاو مڠهيناكن.

ڤركارا 6.

ستياڤ اورڠ عداله برحق كڤد ڤڠيعترافن د مان جوا سباڬاي سأورڠ انسان د سيسي اوندڠ٢.

ڤركارا 7.

سموا اورغ عداله سامرات د سيسي اوندڠ۲ دان برحق تنڤا اڤ۲ ڤمبيذأن كڤد ڤرليندوڠن يڠ سامرات د سيسي اوندڠ۲. سموا اورڠ عداله برحق كڤد ڤرليندوڠن يڠ سامرات درڤد سبارڠ ڤمبازأن يڠ ملڠڬر ڤراشتهارن اين دان درڤد سبارڠ هاسوتن ترهادڤ ڤمبيذأن سدمكين.

ڤركارا 8.

ستياڤ اورڠ عداله برحق كڤد ڤموليهن يڠ بركسن اوليه تريبونل٢ كبڠسأن يڠ كومڤيتين ترهادڤ تيندقن٢ يڠ ملڠڬر حق٢ اساسي يڠ دبريكنڻ اوليه ڤرلمباڬأن اتاو اوليه اوندڠ٢.

ڤركارا 9.

تياد سسياڤا ڤون بوليه دكناكن تڠكڤن، تاهنن اتاو ڤمبواڠن نڬري سچارا سوينڠ وينڠڽ.

ڤركارا 10.

ستياڤ اورڠ عداله برحق دڠن سامرات سڤنوهث كڤد ڤمبيچارأن عاديل دان تربوك اوليه سواتو تريبونل بيبس دان سقسام، دالم ڨنتڨن حق۲ دان تڠڬوڠنث دان سبارڠ تودوهن جنايه ترهادڨڽ.

ڤركارا 11.

1. ستياڤ اورڠ يڠ دتودوه دڠن كسالهن كسكسأن عداله برحق دأڠڬڤ تيدق ساله سهيڠڬ دبوقتيكن ساله منوروت اوندڠ٢ د دالم ڤربيچارأن تربوك د مان دي تله دبريكن سڬالا جامينن يڠ ڤرلو اونتوق ڤمبلانڻ.

2. تياد سسياڤا ڤون بوليه دڤوتوسكن برساله اتس سبارڠ كسالهن كسكسأن اوليه كران سبارڠ تيندقن اتاو كتيڠڬلن يڠ تيدق مروڨاكن سواتو كسالهن كسكسأن، د سيسي اوندڠ٢ كبڠسأن اتاو انتارابڠسا، ڨادا ماس اياڨ دلاكوكن. تياد ڨولا بوليه دكناكن سبارڠ حكومن يڠ لبيه برت دري حكومن يڠ ترڨاكاي كتيك كسالهن كسكسأن ايت دلاكوكن.

ڤركارا 12.

تياد سسياڤا ڤون يڠ بوليه دكناكن كڤد سبارڠ كڠڬوان سوينڠ وينڠڽ ترهادڤ كأدأن ڤريبادي، كلوارڬ، رومهتڠڬ اتاو سورت مثورتڽ، اتاو ڤرچروبوهن كأتس مرواه دان نام بائقڨ. ستياڤ اورڠ برحق كڤد ڤرليندوڠن اوندڠ۲ ترهادڤ ڬڠڬوان اتاو ڤرچروبوهن سدمكين.

ڤركارا 13.

- 1. ستياڤ اورڠ عداله برحق كڤد كبيبسن برڬرق دان برمستوطين د دالم سمڤادن سسبواه نڬارا.
- 2. ستياڤ اورڠ برحق منيڠڬلكن مان٢ نڬارا، ترماسوق نڬاراڻ سنديري، دان كمبالي سمولا كنڬاراڻ.

ڤركارا 14.

- 1. ستياڤ اورڠ برحق مموهون دان منعمتي ڤرليندوڠن ڤوليتيك دالم نڬارا لائن درڤد سبارڠ انياي.
- 2. حق اين تيدق بوليه دتونتوت باكي ڤندعوأن يڠ بنر٢ تيمبول درڤد كسالهن بوكن ڤوليتيك اتاو درڤد تيندقن يڠ برتنتڠن دڠن توجوان٢ دان ڤرينسيڤ٢ بڠسا٢ برساتو.

ڤركارا 15.

- 1. ستياڤ اورڠ عداله برحق كڤد سواتو كورڬانڬارأن.
- 2. تياد سسياڤا ڤون بوليه دلوچوتكن كورڬانڬارأنث سچارا سوينڠ وينڠث اتاو دنافيكن حق منوكر كورڬانڬارأنث.

ڤركارا 16.

- 1. للاكي دان ڤرمڤوان ديواس، تنڤا مڠيرا بڠسا، كورڬانڬارأن اتاو اڬام، برحق بركهوين دان منوبوهكن كلوارك. مريك عداله برحق كڤد حق۲ سامرات برهوبوڠ دڠن ڤركهوينن، دالم تيمڤوه ماس ڤركهوينن دان ڤادا ڤمبوبرنث.
 - 2. ڤركھوينن ھاڻ بوليه دلقساناكن دڠن ڤرستوجوان بيبس دان سڤنوھڻ اوليه ڤيھق٢ يڠ برچادڠ اونتوق بركھوين.
- 3. كلوارك عداله يونيت كومڤولن سمولاجادي دان اساسي دالم مشاركت دان عداله برحق كڤد ڤرليندوڠن اوليه مشاركت دان نڬارا.

ڤركارا 17.

- 1. ستياڤ اورڠ برحق مميليقي هرتا سچارا برسنديرين سرتا سچارا بركوڠسي دڠن اورڠ لائن.
 - 2. تياد سسياڤا ڤون بوليه دلوچوتكن هرتا بنداڻ سچارا سوينڠ وينڠڽ.

ڤركارا 18.

ستياڤ اورڠ عداله برحق كڤد كبيبسن برفيكير، ڤراسأن هاتي دان اڬام ِ حق اين ترماسوقله كبيبسن منوكر اڬام اتاو كڤرچايأنث، دان كبيبسن، سمادا سچارا برسنديرين اتاو سچارا برسام سام دڠن اورڠ٢ لائن دان سچارا تربوك اتاو برسنديري، مڠانوتي اڬام اتاو كڤرچايأنث ملالؤي ڤڠاجرن، عملن، ڤموجأن دان ڤماتوهن.

ڤكارا 19.

ستياڤ اورڠ عداله برحق كڤد كبيبسن ڤنداڤت دان مڠلواركن فيكيرن; حق اين ترماسوقله كبيبسن ممڬڠ ڤنداڤت تنڤا ڬڠڬوان دان منونتوت، منريما دان مثيباركن معلومت دان بواه فيكيرن ملالؤي سبارڠ ميديا دان تنڤا مڠيرا سمڤادن.

ڤركارا 20.

- 1. ستياڤ اورڠ عداله برحق كڤد كبيبسن برهيمڤون سچارا امان دان منوبوهكن ڤرساتوان.
 - 2. تياد سسياڤا ڤون بوليه دڤقسا منجادي اهلي مان٢ ڤرتوبوهن.

ڤركارا 21.

- 1. ستياڤ اورڠ برحق مڠمبيل بهاڬين دالم كراجأن نڬاراڻ، سچارا لڠسوڠ اتاو ملالؤي واكيل٢ يڠ دڤيليه دڠن بيبس.
 - 2. ستياڤ اورڠ عداله برحق كڤد ڤلواڠ سامرات كڤد ڤرخدمتن عوام دالم نڬاراڽ.
- 3. كماهوان رعيت هندقله منجادي اساس كويباوأن كراجأن; كماهوان اين هندقله دبوقتيكن ملالؤي ڤيليهنراي بركالا يڠ سجاتي يڠ مان هندقله دأداكن سچارا سجاكت دان سامرات دان هندقله دأداكن سچارا اوندي سوليت اتاو ملالؤي اچارا ڤڠوندين بيبس يڠ كتارا.

ڤركارا 22.

ستياڤ اورڠ، سباڬاي اڠڬوتا مشاركت، عداله برحق كڤد كسلامتن سوسيال دانس برحق منجاديكن سواتو كثاتأن، ملالؤي اوسها نڬارا دان كرجاسام انتارا بڠسا دان منوروت اورڬانيساسي دان سومبر٢ دالم نڬارا ماسيڠ٢، حق٢ ايكونومي، سوسيال دان كبودايأن يڠ ترمستي باڬي كموليأنث دان ڤركمبڠن بيبس كڤريبادينڻ.

ڤركارا 23.

- 1. ستياڤ اورڠ عداله برحق كڤد ڤكرجأن، كڤد ڤميليهن ڤكرجأنڻ سچارا بيبس، كڤد كأدأن٢ ڤكرجأن يڠ عاديل دان برفائده باڬيڻ دان كڤد ڤرليندوڠن درڤد ڤڠڠڬورن.
 - 2. ستياڤ اورڠ، تنڤا سبارڠ ڤمبيذأن، عداله برحق كڤد ڤڠڬاجين يڠ سام باڬي كرجا يڠ سام.
- 3. ستياڤ اورڠ يڠ بكرجا عداله برحق كڤد ڤمبايرن سارأن يڠ عاديل دان برفائده باڬيث يڠ مان ممڤستيكن بوات ديري دان كلوارڬث سواتو كهيدوڨن سسواي دڠن كموليأن مأنسي، دان يڠ مان دتمبه، جك ڨرتو، اوليه چارا۲ ڨرليندوڠن سوسيال يڠ لائنث.
 - 4. ستياڤ اورڠ برحق منوبوه دان منجادي اهلي كساتوان سكرجا باڬي ممڤرليندوڠي كڤنتيڠن كڤنتيڠنڽ.

ڤركارا 24.

ستياڤ اورڠ عداله برحق كڤد ريهات دان ماس لاڤڠ، ترماسوق باتسن مناسبه كأتس ماس بكرجا دان چوتي برڬاجي يڠ بركالا.

ڤركارا 25.

- 1. ستياڤ اورڠ عداله برحق كڤد سواتو طرف هيدوڤ يڠ ممادائ باڬي كصيحتن دان كباجيقن ديري دان كلوارڬڽ، ترماسوقله ماكنن، ڤاكاين، ڤرومهن دان ڤڠاوسن ڤراوبتن سرتا ڤرخدمتن سوسيال يڠ ڤرلو، دان برحق كڤد ڤرليندوڠن كتيك برلاكوڽ ڤڠڠڬورن، كساكيتن، كتيدقاوڤايأن، دڤرجندأن، كعزورن اتاو لائن٢ ككورڠن كهيدوڨن دالم كأدأن د لوار كاولنڽ.
 - 2. ايبو دان انق عداله برحق كڤد جاكأن سرتا بنتوان خاص. سموا كانق۲، سمادا دلاهيركن د دالم ماهوڤون د لوار نكاح، هندقله منعمتي ڤرليندوڠن سوسيال يڠ سام.

ڤركارا 26.

- 1. ستياڤ اورڠ عداله برحق كڤد ڤلاجرن. ڤلاجرن هندقله دبريكن ڤرچوما، سكورڠ كورڠث ڤادا ڤريڠكت اول دان اساسث. ڤلاجرن ڤريڠكت اول هندقله دواجبكن. ڤلاجرن تيكنيكل سرتا ڤروفيسيونل هندقله دسدياكن اونتوق عموم دان ڤلاجرن تيڠڬي هندقله ممڤوثاي اكسيس يڠ سامرات كڤد سموا اورڠ اتس داسر كبوليهن.
- 2. ڤلاجرن هندقله دتوجوكن كڤد ڤركمبڠن سڤنوهڻ كڤريبادين مأنسي دان كأره ممڤركوكوهكن لاكْي راس حرمت باكْي حق٢ دان كبيبسن اساسي مأنسي، لاڻ هندقله مموڤوق ڤرسفهمن، كصبرن دان ڤرصحابتن د كالڠن سموا نكارا، بڠسا اتاو كومڤولن٢ اكام، دان هندقله مماجوكن سكالا ككْياتن بڠسا٢ برساتو دمي ممليهارا كأمانن.
 - 3. ايبو باڤ ممڤوثاي حق تردهولو اونتوق مميليه جنيس ڤلاجرن يڠ اکن دبريکن کڤد انق٢ مريك.

ڤركارا 27.

- 1. ستياڤ اورڠ برحق سچارا بيبس مڠمبيل بهاڬين دالم كڬياتن كبودايأن مشاركتث، منعمتي كسنين دان سام٢ مراسائ كماجوان سائنس دان فائده فائدهث.
- 2. ستياڤ اورڠ عداله برحق كڤد ڤرليندوڠن كڤنتيڠن٢ مورل دان كبندأن حاصيل دري سبارڠ ڤڠحاصيلن سائنس، كسوسسترأن اتاو كسنين يڠ مان اياڻ عداله ڤنچيڤتاڻ.

ڤركارا 28.

ستياڤ اورڠ عداله برحق كڤد سواتو سوسونن سوسيال دان انتارابڠسا دالم مان حق۲ اساسي دان كبيبسن يڠ ترمكتوب دالم ڤراشتهارن اين بوليه دجاديكن كثاتأن سڤنوهڨ.

ڤركارا 29.

- 1. ستياڤ اورڠ ممڤوثاي كواجيڤن ترهادڤ مشاركت هاڻ دالم مان ڤركمبڠن كڤريبادينڻ سچارا بيبس دان سلوروهڻ ترموڠكين.
- 2. دالم مڠعملكن حق٢ دان كبيبسنث، ستياڤ اورڠ ترتعلوق هاڻ كڤد باتسن٢ سڤرتي يڠ دتنتوكن اوليه اوندڠ٢ سماتا مات باڬي توجوان منجامين ڨڠيعترافن دان ڨڠحرمتن يڠ سڨاتوتڻ ترهادڨ حق٢ دان كبيبسن اورڠ لائن دان اونتوق مندكتي كڨرلوان٢ سڨاتوتڻ باڬي اخلاق، كتنترمن عوام دان كباجيقن عموم دالم سواتو مشاركت يڠ ديموكراتيك.
 - 3. حق۲ دان كبيبسن اين تيدق بوليه سام سكالي دعملكن سچارا برتنتڠن دڠن توجوان۲ دان ڤرينسيڤ۲ بڠسا۲ برساتو.

ڤركارا 30.

تياد اڤ٢ جوا دالم ڤراشتهارن اين بوليه دتفسيركن سباڬي سديا ترسيرت ممبريكن كڤد مان٢ نڬارا، كومڤولن اتاو ڤرسأورڠن سبارڠ حق اونتوق مليبتكن ديري دالم اڤ٢ كڬياتن اتاو ملاكوكن اڤ٢ ڤربواتن دڠن توجوان مموسنهكن اڤ٢ حق دان كبيبسن يڠ ترمكتوب دالم ڨراشتهارن اين.